



張逢恩 先生

閩南語 · 散文 · 學生組

第三名

得獎作品

碎片雨

得獎感言

著獎感言無其他愛加講 ê，干焦想欲好好說多謝。

感謝美親恰濟位老師一路相 thīn，感謝廷睿頂真 ê 指導，感謝永遠 ê 母鄉彰化，感謝當時 ê 期待恰傷害，hām 逐家相逢，實在真感恩。

向望未來會使用詩 ê 方式過生活，毋通閣過甲像小說全款。

碎片雨

初到臺北 ê 彼幾日，無親像印象中總是雨落袂離，敢若記持中佇南方 ê 熱，猶叫是我猶未離開故鄉彰化。臺北 ê 天氣無偌久龜跩就趕出來矣。一日過晝了後，學校四籬圍仔羗羗咧，無張持西北雨煞落落來，鼻著滯滯 ê 雨水味，我才確定現此時所倚 ê 位置。

哪會知課上無幾工，雄雄連假繼咧來，只好毋情毋願轉去到一切 ê 起頭。頭擺享受歸鄉 ê 滋味，有一款毋知影欲按佢講起 ê 奇妙感應，檢采這款感覺真濟人捌體會著。閣較熟似 ê，嘛攏成做生份矣。

佳哉猶有無改變 ê，彼个查埔人猶是有來接我。大主大意欺騙爸母講我坐 ê 是暗班車，干焦是為著欲 kah 伊去食一碗炕肉飯，才毋是為著數念家鄉味，純然是欲回憶做伙 ê 感覺 niâ。

生日佇九月，入來到新 ê 環境，攏著愛閣孤單一擺。來到大學，逐家拄熟似 niâ，siáng 知影你生日？又閣欲按怎替你過生日咧？過去 ê 朋友嘛四散去矣，誠稀微。檢采通講是先知，專工對高中就囡佇心內 ê 彼个查埔人，這馬總算有路用矣。

買一塊雞卵糕，落尾阮歡歡喜喜閣羗去圖書館。圖書館 ê 門早嘛關矣，街仔路無啥物人咧來來去去，暗眠摸成做咱的背景，氣氛不止仔浪漫。蠟燭拔起來，雞卵糕攏入喙進前 ê 冷盤菜，是你喙脣 ê 溫度，猶無法度放袂記。彼當時我 ê 手幔佇伊額頸頂懸，雄雄感受著記持中 ê 中部——彼款氣溫，袂落雨，身軀免啥振動，汗就家己對毛管空走出來，閣鬱佇我 ê 手抄內面。講起來奇怪，竟然連這款物件攏成做我數念 ê 家鄉味。毋過，唸了後，啥物驚喜嘛無，伊就載我倒轉。不時會共朋友怨嘆這个敢若柴頭 ê 查埔人，毋過伊冷淡 ê 體貼，我最後猶是接受，歡喜，kah 寡無奈。

料想袂到，白泚無味 ê 一切煞變做咒讖。若是早知影會犯著禁忌，我就無欲做生日矣。嘛凡勢我會共伊辦 kah 較奢颺一寡，上無較袂留遺憾。毋過，講這攏已經傷慢。

假期結束，隨人倒轉。

駛離開高架化總是無結果 ê 彰化，來到繁華 ê 城市，臺北 ê 一切漸漸有較慣勢。雖然先進，毋過因為地下道傷濟，定定看無外口，看無日頭 ê 空間全款光 phi 頭，下 phāing，袂輸咱 ê 生

活干焦需要日光燈。

起來到地面了後，有時煞顛倒會數念下跤 ê 好。按車頭行出來，無提早看氣象，今仔日臺北猶是毛毛仔雨落袂離，aih，起 ak-tsak 嘛著行李揹咧，趕緊上計程車。

了後出外，我就較巧矣。會記得提彼枝阿媽送予我 ê 雨傘，較袂予臺北 ê 雨沃 kah 澹糊糊。彰化無啥落雨，所以雨傘猶閣新新，顯目 ê 紺色，雨傘枝仔猶金鑠鑠。

頭先拄著雲雲仔雨，閣會歡喜對冊包共雨傘提出來，展開，袂感覺著麻煩，閣會想像彼款英國式 ê 浪漫。這站仔才致覺著雨 ê 恐怖 kah 費氣。臺北 ê 雨 kah 咱大學生誠相嚮，控制袂牢，若風一下副落去，雨傘就接載袂牢矣，就按呢目鏡定定沐著幾若滴雨水。

一改參加活動了，準備欲行轉去學校，彼是我頭擺佇雨都體會著狂風暴雨。雨傘當做武器，阮雖然擰斜斜欲共擋，雨水銃子猶是戮空入來。最後武器嘛落漆，啊——我 ê 雨傘開花矣。雖然毋是啥物大代誌，毋過後壁閣較慘。想說按怎來 ê，就予伊按怎去，所以我想欲用風共伊吹轉來，哪會知影伊遐粗魯，順繼共我 ê 傘拚拚歹，雨傘枝斷去。缺角 ê 雨傘花，也著無奈接受。閣較按怎講，異鄉度日，錢著愛儉儉仔用，心內實在對阿媽疼孫 ê 心意感覺袂得過。所以，猶是予伊伴我度過了後 ê 落雨日。

毋過，缺角實在是真殘酷 ê 代誌，準一屑仔爾嘛袂好倒轉來矣。

一陣風雨過去，單淡薄仔烏雲的天閣再浮出頭。抑我咧，繼續度過一工閣一工普通的讀書生活。都市 ê 生活緊步，所以早就按算拜四無欲排課，予家己歇喘，讀冊，寫字，會當清閒一下。

雖然無排課，猶是固定予家己一寡儀式感，差不多時間起床，早頓食了，就行對讀冊室去。路裡攏會看著彼寡清彩旋咧路邊 kah 壁頂 ê 藤仔，閣有無受地心引力揸牢，會得輕鬆仔 peh 上厝頂 ê 貓仔，毋管烏雲罩頂，個猶是老神在在。總算行到位，讀冊室通常干焦我一个，有夠清幽。

欲做一个「文青」ê 款式，就是佇咖啡廳罔看冊，指頭仔共時間當做反動 ê 動力，日頭光予炤到盡磅，按呢度過一工。我嘛向望彼款充實閣袂過頭無閒 ê 生活，總是毋捌成功。計畫代先訂好勢，線頂作業煞雄雄就閣來，只好共手頭彼本冊捱揸，佇空白 ê 頭殼若像擠齒膏彼款，硬攞出幾個仔字眼，有時陣 ná 閣咧想 niâ，就看著日頭已經佇西片聽候落山。疫情了後，科技進步走若飛，毋是留戀過去，只是想欲 kah 伊維持淡薄仔距離。

就按呢相連繼度過空白 ê 拜四。想講應該沓沓仔會較順才著，代誌煞閣再變化。

漫談幾若工，彼暗佇讀冊室，恬靜予鐵桌仔 ê 振動拍破，手機仔顯示 ê 是彼个查埔人。本底掠準講按呢 ê 氣氛應該愛是肅靜 ê，想袂到電話彼片攏是籃球直直砢塗跔 ê 聲，淡薄仔討厭。詳細共聽，伊總算講話：「咱猶是先做朋友較好。」應啥物我袂記得矣，干焦會記得幾滴仔目屎共桌面津做水窟仔。後壁伊閣講幾句安慰 kah 鼓勵 ê 話，若是我會記得就好，上無有時仔會使共當做嗎啡來用。

傳說按呢講，逢九著愛較恬定咧，無適合做生日。是按怎無避免，是按怎欲予伊來替我過，今欲後悔嘛袂赴矣。

罕得彼工臺北 ê 天氣真好，總是我無心去感受。

都市人 ê 心情檢采攏 kah 天氣相閣，不時袂定著。感情 kah 雨傘花全款缺角了後，我嘛按呢生活落去。讀冊 ê 時陣，猶是放送我上愛 ê k-pop 舞曲，總是彼久干焦共當做佛經咧聽。聽候落雨 ê 時，雨滂滂滴佇玻璃頂，雄雄身軀才感受到性命力，袂輪落大雨全款，目屎滂滂津落，予畫面看起來親像一齣悲哀 ê 喜劇。

才活過短短十八年，失去一段感情 ni 年 niā 算啥？若是干焦按呢，確實應該歡喜。

會記一擺坐佇讀冊室，雄雄閣想起往事，為著莫予負面 ê 藤旋甲規心肝，我拍開面冊，直直看新 ê 記事，暫時莫閣去回憶。只是，現實全款予人失望。老師面冊分享，記憶中 ê 彼間冊店，年底就欲收擔。

高中三年，是我文學 ê 啟蒙期，往過毋捌看冊 ê 我，因為予文學感動著，毋才變做家己料想袂到 ê 「文青」。彼間獨立冊店「青青的島」，是我無張持發現 ê，攏是緣分。彰化罕得 ê 文化資源，會使相搪實在好運。伊所紮來 ê 文字，若像櫻花雨，佇我行過 ê 時拄好落落來，予我看著文學 ê 美麗 kah 理想。

如今閣行過，火車頭頭前 ê 小西巷全款恬靜，只是欠一葩柑仔色 ê 電火，賭荒廢 ê 花草 kah 蔥蔥倚佇遐 ê 白壁。

若欲講我到底閣賭啥？記憶中 ê 物件，先是綴時間風化，色水愈來愈暗淡，繼落去分解化做沓沓滴滴 ê 碎片，親像火焮散甲無影無跡去矣，凡勢伊早就變做雲炷，永遠消失佇我身軀邊。

袂記得是當時，拄好佇捷運站搪著老師，就按呢阮佇捷運頂開講一下。老師問我以後會想欲轉去故鄉拍拚無？我講：「應該會。」毋過老師伊煞講：「敢閣有機會通轉？」是啊，敢閣有

機會通轉，未來會是按怎咱攏毋知，準會轉去，彼敢閣是我記持中 ê 故鄉？

閘門開 -- 開，準備出站。逐个人雨傘擲咧，大概是塗跤面頂閣咧落雨矣。雄雄煞躊躇敢欲隨行出去，彼寡記持 ê 碎片摻濫佇雨內面，恰雨同齊瀟落來，啊，上無我佇下底有通閘，袂 hōo 沃 kah 規身軀澹糊糊。